

Է .

Ով որ սիրոյ տեր մանկան չողորմի, ինքըն մեռանի՛,
 Իր մահն ի մորին լինի ' Լ իր բերնին հաղորդ չի գտուի՛.
 Օծերն ալ թաւութ կապեն, խատ գորտերն ի սարկաւազնի,
 Ագռաւն ալ երեց լինի, սել ճայեկն իւր հաբեղանի:

Ը .

Կանչեմ, ալանի կանչեմ ուր որ իմ ձայնըն հասանի.
 Թող աւագանի ծընունդ մարդ սիրուն պելան չընկընի.
 Սերն ալ գեմ ոտուի ունի ու ձեռուի՝ գետ էտ հարամի.
 Եկեք հարամին տեսեք, հարամին որ նետ մի չունի,
 Անդուր ' Լ անըսպառ եկեալ անգըրօղ հոգիս կու տանի,
 Եկեր ի գըլուխս ելեր՝ երեսօքս ի քարշ կու տանի:

Թ .

Եկին ու բերին խապար, թող լեզուն չորնայ բերողին:
 Քո եարն ի Պուռսայ քաղաք նայ տեսաք ի մեշ շուկային.
 Ձեռկունքն Է դալալ տըլել ու նստել առջել գընողին.
 Գընո՛ղ, գընէ՛, մի՛ վախել. վա՛յ հազար իմ կորսընողին:

ՏԱՍՆԵԻԹԹՆԵՐՈՐԴ ՏԱՂԱՇԱՐՔ

Ա .

Գընա՛, իմ հոգոյս հոգի, իմ սըրտէ սիրած սիրելի,
 Գընա՛, իմ աչացըս լոյս, որ անեծքս ի քեզ չիրանի:

Բ .

Չիմ եարն ի գընալ տեսայ, կանչեցի՝ «Իմ կարմի՛ր երես».
 Դարձաւ ու ճաւապ ետուր, թէ՛ «Քանի՛ ապլահ գըրուցես.
 Ստեղծօղն ինձ երես տըլեր, քեզ աչեր, դու կանգնի՛ր ու տե՛ս:
 –Չդարտակ տեսնելն ի՞նչ անեմ, երբ ծոցուդ մահրում կու հանես.
 Հանց որ մահրում կու հանես, բե՛ր պատանքն ու դիր զիս ի ներս:
 –Հեռի՛ պատանքն ի քենէ, բանամ գծոցս, արե՛կ մո՛ւտ ի ներս:
 –Աստուած ողորմի՛ քո հօրն, ի՞նչ աղէկ թապտիր մի կ'անես:
 Կուտաս ինձ շունչ ու հոգի, մահուանէ ի կեանս կու փոխես: